

POETI JOISTI





GINO ADAMO

LA FICURINIA

Bedda, frisca e carnusa,
crisci 'nta la terra supra li timpuna,
di tanti culura, è puru spinusa,
sulu cu la tocca si n'adduna.

Mangiala virdi a prima culazioni,
pi' 'ncuminciari bona la matina,
ma nun esagerari cu li porzioni,
se no ti trovi cu la panza china.

Russa o gialla, nun avi 'mpurtanza,
sta ditta 'nta la pala cu valuri,
la purpa so è china di sustanza,
lu sulì la matura cu so caluri.



Li semi ch'avi dintra 'un fannu chianti,
ma puru iddi servinu a quarcosa,
pi lu dicottu ciuri cogghini tanti,
sicuru chi lu stomacu s'arriposa.

Sta attentu, lu periculu 'un su li spini,
chi si virino e nun ci metti manu,
ma quannu hai li panareddi chini,
levi scorci e manci chianu chianu.

Ma la surpresa ci l'hai a la fini,
ad una ad una calanu comu nenti,
dopu chi ni manciasti du' dozzini,
t'assetti 'nta lu cessu e ti ni penti.

Pintutu d'aviri fattu st'abbuffata,
vurrissi li vuredda arrisittari,
certu ch'un abbasta 'na furzata,
cu atri mezzi ti po' allibbirtari.





DINO ALTESE

CI VOLI PICCA

Nun c'è bisognu d'essiri riccu,
p'essiri cuntenti:
basta sta vita
cu tutti li turmenti;
basta rispittari la natura
chi già soffri e mori
e, si ci duni aiutu,
spampina lu to cori;
nun c'è bisognu d'essiri riccu
p'essiri cuntenti,
basta stari n-peri,
cu boni sintimenti;
nun c'è bisognu mancu di furtuna,
basta un ciuri, n-amicu, tanticchia î luna;
nun c'è bisognu d'essiri riccu,
pi essiri cuntenti:
basta chi duni amuri,
lu restu 'un cunta nenti!





NINO BARONE

ROSA DI LU ME JARDINU

Mentri lu friddu mpera ncuntrastatu
iu mi nutricu di lu to caluri
e centu voti dicu: amuri amuri
nun pozzu stari senza lu to ciatu!

Cumpagna di la vita, matri, ciuri
chi mprufumasti lu me siminatu,
chi dasti un sensu ad ogni passu jittatu
facennu meli puru lu duluri!

Tu si l'amuri veru, 'u chiù pirfettu,
l'unica rosa di lu me jardinu
chi s'ha' dunatu dànnumi risettu!

Mentri lu friddu mpera di cuntinu
iu comu un suli nfocu a lu to pettu
e nfoca 'u cori quannu t'haiu vicinu!





ADELE CATALANO

**A CANNILA
E LU PAPPAGGIUNI**

Si pappagghiuni!
Sì, ti rissi chi si pappagghiuni!
Mi firrii sempri 'ntunnu.
Sempri!
Chi quannu ti taliu...
si sapissi?
Mi pigghia 'u giuliu.
Chi chiffari chi hai:
ri cca e ri ddà;
ri supra e ri sutta.
Tantu chi mi fa mali 'a testa.
Ti ni stai sempri a ciancu a mia.
Sempri!



Jornu e notti
notti e jornu.
Tantu chi 'un haiu chiù riposu.
Chi pappagghiuni!
T'avvicini... ma poi, quannu pari a tia, t'alluntani.
Cu sti aluzzi..
senza fari scrusciu,
tu mi lassi.
Cca, rintra stu stanzinu, sugnu scunsulata;
e a 'u scuru, t'aspettu sempri, pi tutta la me vita.
Sempri!
L'amuri meu jardi comu 'u micciu di sta cannila.
Mi cunsumu
a lentu a lentu.
E comu la cira squagghiu,
mentri pi tia abbruciu!





ALBERTO CRISCENTI

**STU NOSTRU IDIOMA
È STIDDA NTA LI CELI!**

Quannu sentu parlari ‘u nostru idioma
la menti pigghia focu, l’occhiu riri;
mi pari comu nèsciri d’un coma
e provu sensazioni a mai finìri.

Di Parma a Bari, di Milanu a Roma,
sta nostra lingua ormai pigghiau putiri;
sumigghia a un cantu anticu, a na cialoma,
ma d’ogni cori è liggi, amuri e firi!

Stu nostru idioma è stidda nta li celi!
Parlâmulu e ‘nsegnâmulu nta ‘i scoli
comu si fa nta ‘i chesi cu ‘i Vangeli.

Nun c’è bisognu agghiùnciri paroli:
la lingua di lu Tempiu¹ e di lu Meli²
‘nsegnamuccilla a tutti li figghioli!

¹ *Domenico Tempio*, poeta siciliano. (Catania, 22 agosto 1750 - Catania, 4 febbraio 1821).

² *Giovanni Meli*, poeta siciliano. (Palermo, 6 marzo 1740 - Palermo, 20 dicembre 1815).






GIUSEPPE INGARDIA

ARRISCIUPPANNU ARRISCIUPPANNU...

Rusidda tutta storta e vicchiaredda
firriava di casa 'n-casa i figghi so'
dumannannu piatusa 'na vastedda!
Murali di lu vecchiu saggiu anticu:
“Na matri deci figghi li manteni,
ma deci figghi 'na matri sula nò!”
Pi anni finu chi jammi ci riggèru
la schina si la rumpiu terri terri,
arrisciuppannu 'cassati' di vacchi¹
tra ristucciàti amari comu feli
pi fari focu 'nta lu cufularu;
alivi e spichi all'acqua suli e ventu
niscennu all'arba e riturnannu 'o scuru.
Quannu fu l'ura di vulari 'ncelu
'ntra 'i piechi di la facci arripudduta,
li denti so' si muzzicaru 'a vacca:
nun era smorfia di duluri forti,
ma chiantu ch'aiutu so' finiu ca' morti!

¹ Raccogliendo escrementi di mucche tra le stoppie: essiccati dal sole cocente, venivano usati per far fuoco con buoni risultati.





VITO LUMIA

NUN T'AIU VISTU MAI
'CUSSÌ VICINU

O caru Munti, si nun sunnu l'occhi,
aiutami a capiri stu misteru;
ma vogghiu virità senza mprapocchi,
dimmi si sbagghiu o siddu è tuttu veru.

Iu stavu puitannu nta sta 'gnuni¹
jennu passiannu davanti e darrerri,
quannu mi jeru l'occhi a lu balconi
e s'addumaru centu e chiù pinzeri.

Li casi e lu "Casteddu" su' vicini
pari ca si putissiru tuccari,
ti livasti la "còppula" e camini?
Daveru 'un sacciu chiù zoccu pinzari!

«O pezzu di babbazzu - m'arrisposi -
m'allura è veru ca si' veru loccu!
Iu nun mi movu, nun circari scusi,
nun m'hai taliatu mai cu lu Sciroccu?».

¹ *La mia famosa "'gnuni ncantata" cioè la stanza ove ho arredato il mio studio o studiolo che dir si voglia.*





GIUSEPPE MORFINO PICCIONE

CÒFANU

Còfanu,
tu cu l'occhi sempri a la via,
vigghianti di livanti a punenti,
quanti voti hai sintutu
lu ventu ciusciari
e li cavaddi di lu mari jisari!


Quantu varcuuzzi e vileri
hai vistu affunnari
e òmini vuciari aiutu
a li to' peri!

Puru tu cuminci a 'nvecchiari,
lu marusu ti mancia li peri
e pezzi di li to cianchi
si pinnulianu a mari.

Còfanu,
avisti lu granni onuri
di viriri pi primu
Maria SS. arrivari
e li cristiani
'n ginocchiu priari!

Sa' quanti cosi ni putissi diri,
ma si' fattu di petra e nun poi
parlari!





FRANCESCO SAVALLI

LU MUNNU D'ORA


Amici mei, stu munnu 'un è chiù munnu
pi quantu cosi si vannu sintennu,
cu tutti sti ribelli chi ci sunnu
la dignità di l'omu sta finennu.

Già semu quasi arrivati a lu funnu,
la genti a picca a picca va murennu.
Viu tutti sti cosi e mi cunfunnu:
amuri e firi vannu 'mpassulennu.

O patreternu, Tu chi tuttu viri,
carma st'infamità fatti di l'omu,
svigghia nna l'omu l'amuri e la firi.

La genti onesta chiù nun sapi comu,
cu stu sistema avanti 'un si po jiri,
pi chissu nui 'nvucamu li To nomu!





MARCO SCALABRINO

QUANNU TI PARRU ...

Tu nun ascuti
pirchè nun m'accordi lu tempu
nun dicu di ncrucchittari na frasi
o di ncucciari dui palori
ma di grapiri la vucca macari
chi ti l'aggarri arrè
comu si, pi la to spirtizza
o cui lu sapi quali autra virtù,
ci smurfiasti già ogni filu e signu
di zoccu jò avia ancora in menti
di spicccicari e nun potti, pirchè
tu nun ascuti a nuddu
ti piaci la to zurra vuci
sciali cu l'ecu di li toi bavorni
ti preji si supra un pinzeri to
ripitutu però di mia paraggiu
ti cuntrapigghi
ti fai appellu e cassazioni
avvocatù judici e testimoniu
pirchè, ora ci voli,
tu nun ascuti a nuddu fora-tia
e mancu sparti, forsi.





GIUSEPPE VULTAGGIO

MARIA...LUCI E PUISIA!

Regina di li cieli e matri a “Cristu”,
«Tu» si a Misiricordia cunsacrata,
si matri di sta terra a Tia assignata
e senza mai bisognu di lu vistu.

Pi cui cerca ‘u “Signuri” si fragranza,
pi cui persi la meta si lu portu,
pi tutti li malati si cunfortu,
pi cui è chi fa la verra si alleanza.

Si ‘un sacciu soccu fari si virtù,
si perdu li me forzi si energia,
Tu si lu beni chi nun scordu chiù.

Tu si la luci quannu nun ci viu,
Tu si la fonti di la me valia...
Tu si la strata chi mi porta a “Diu!”

